

## FASA PENYIARAN KANDUNGAN MEDIA KETIKA NEGARA DILANDA BENCANA DAN KEMATIAN TOKOH ATAU PEMBESAR ISLAM

Mohd. Daly Daud, Md Rozalafri Johori, Zulkifli Aini, Rahmahtunnisah Sailin, Mahfuzah  
Salleh, Wawarah Saidpudin, Hazwani Damanhuri

mohddaly@kuis.edu.my

Kolej Universiti Islam Antarabangsa Selangor, KUIS

### ABSTRAK

Penyiaran kandungan media adalah satu aktiviti komunikasi massa yang membabitkan proses pengumpulan dan penerbitan bahan-bahan yang bersesuaian serta berkaitan dengan berita atau maklumat untuk disampaikan kepada masyarakat agar difahami dan dihayati. Namun, sehingga kini tiada garis panduan yang *standard* terhadap penyiaran kandungan media yang sesuai disiarkan ketika negara dilanda bencana dan kematian tokoh atau pembesar Islam. Justeru, kajian ini ingin merangka garis panduan asas penyiaran kandungan media oleh stesen TV di negara ini ketika negara menghadapi kejadian tersebut. Kajian kualitatif ini mendapatkan maklumat daripada informan dengan menggunakan reka bentuk kajian secara perbincangan meja bulat dengan panel terpilih dalam kalangan pembuat dasar, ilmuan Islam dan pengamal media. Kemudian maklumat tersebut disusuli dengan triangulasi dengan data utama yang diperolehi daripada temu bual secara mendalam dengan pembuat dasar, ilmuan Islam dan pengamal media. Hasil kajian mendapati bagi fenomena tersebut, garis panduan penyiaran perlu dalam tiga fasa utama penyiaran kandungan media yang mana terdiri daripada persediaan kandungan media pra kejadian, kandungan media semasa kejadian dan kandungan media selepas kejadian. Kesimpulannya, hasil kajian ini dapat memberi panduan kepada pengamal media dalam usaha memurnikan kandungan siaran ketika negara dilanda bencana dan kematian tokoh atau pembesar Islam berdasarkan prinsip dan nilai Islam sejagat dalam kerangka Malaysia.

**Kata kunci:** kandungan media, garis panduan, bencana negara.

## **1.0 PENGENALAN**

Bencana mahupun peristiwa-peristiwa yang mendukacitakan hampir keseluruhan rakyat sesebuah negara sewajarnya disantuni dengan cara yang berhemah agar kedukaan dapat dipulihkan dengan pelbagai bentuk sokongan dan yang paling utama agar seluruh insan yang terlibat ataupun tidak, dapat melihat pengajaran atau ibrah serta mengukuhkan keimanan dan ketakwaan kepada Allah maha pencipta, yang maha pengasih dan penyayang.

Pada hari Perkabungan Negara, rancangan hiburan di semua saluran radio dan televisyen perlu ditangguh dan digantikan dengan bacaan al-Quran dan program berunsur keagamaan (Berita TV9, 18 Ogos, 2014).

Bagi stesen radio dan TV, persediaan untuk menghadapi bencana seperti ini tidak wujud kerana garis panduan sedia ada tidak memperuntukkan bentuk rancangan bagaimana yang harus ditayang atau diperdengarkan kepada khalayak. Akta Komunikasi dan Multimedia 1998 yang menggantikan Akta Penyiaran 1988 dan Akta Telekomunikasi 1950, berkuatkuasa 1hb April 1999 (Seksyen 273, CMA '98) serta garis panduan dan kod sedia ada turut tidak membincangkan perkara-perkara berkaitan perkabungan atau seumpamanya.

Justeru, pasukan penyelidik mendapati wujudnya kelompangan yang perlu diisi memandangkan bencana akan tetap berlaku walau di mana sahaja tanpa mengenal bila atau siapa. Apabila berlaku sesuatu tragedi sebagaimana dimaksudkan sebelum ini, maka sebagai penyiar pastinya akan lebih mudah menjalankan peranannya sekiranya terdapat garis panduan berkaitan program yang boleh diterima pakai oleh semua stesen penyiaran sama ada kerajaan atau swasta.

Pasukan penyelidik yakin terdapat pelbagai program yang boleh dibangunkan dengan mengguna pakai format program sedia ada atau dengan pengubahsuaian yang membolehkan pelbagai program disiarkan semasa atau dalam tempoh bencana melanda negara. Maka penyelidikan ini amat penting dijalankan agar program-program yang diterbitkan oleh stesen penyiaran negara bersifat membangun, memperteguh keimanan dan ketakwaan kepada Allah SWT, dalam masa yang sama tidak menyinggung perasaan atau mengabaikan tekanan emosi, agama dan bangsa yang lain. Dalam hal ini penjelasan berhubung konsep bencana menurut

Islam difikirkan perlu dibincangkan dengan lebih baik dengan mengambil kira penjelasan daripada ulama dan agamawan dalam bidang-bidang khusus.

## **2.0 KONSEP BENCANA, TOKOH ATAU PEMBESAR ISLAM**

Dalam budaya tradisional, bencana ditafsirkan sebagai hukuman Tuhan sebagai tanda-tanda atau petunjuk dan kehendak Yang Maha Kuasa (Vitaliano, 1973). Rautela (2006) turut menjelaskan terdapat pelbagai jenis bencana antaranya ialah bencana semula jadi (banjir, taufan) dan bencana teknologi (kemalangan industri-letupan, kebocoran gas, kemalangan pengangkutan udara, laut, dan darat). Ia terhasil daripada kesan perbuatan manusia terhadap alam, antaranya hakisan tanah dan tanah runtuh (Frazier, 1999). Selain itu, bencana juga boleh membawa kepada kemusnahan yang melampau dan menjejaskan masyarakat dan memerlukan bantuan daripada pihak luar bagi mengatasi bencana tersebut (Riley & Meadows, 1997).

Alexander (2006) menjelaskan kesan daripada berlakunya bencana boleh diukur dari segi jumlah kematian, kerugian kewangan dan bilangan pelarian. Kemusnahan yang terhasil daripada bencana juga boleh membawa kepada kesan jangka masa panjang seperti banjir, tsunami, manakala kesan jangka pendek seperti kemalangan jalan raya, keretapi dan kapal terbang terhempas. Menurut Eisensee & Stromberg (2007) pula, sesuatu keadaan itu dianggap bencana sekiranya ia menepati salah satu keadaan ini seperti sepuluh atau lebih ramai orang dilaporkan terbunuh, 100 orang atau lebih yang dilaporkan terjejas, cedera atau kehilangan tempat tinggal, terdapat pengisytiharan darurat atau terdapat panggilan untuk bantuan antarabangsa. Kerosakan dan kemusnahan yang terjadi akibat daripada bencana memerlukan pertolongan kecemasan dari pelbagai sumber agar bantuan yang diperlukan seperti pengangkutan, makanan dan air, jaminan keselamatan iaitu tempat tinggal, pakaian, bekalan perubatan dapat sampai ke tempat yang betul pada waktu yang tepat (Kathleen, 2012).

Di Malaysia, Majlis Keselamatan Negara (MKN) mendefinisikan bencana sebagai suatu kejadian yang menyebabkan gangguan kepada aktiviti masyarakat dan urusan negara, melibatkan kehilangan nyawa, kerosakan harta benda, kerugian ekonomi dan kemusnahan alam sekitar yang melangkaui kemampuan masyarakat untuk mengatasinya. Oleh yang demikian, ia memerlukan tindakan pengembelian sumber secara menyeluruh (Arahan Majlis Keselamatan Negara, No. 20: Dasar dan Mekanisme Bencana: Semakan 2012).

Dalam kajian ini tokoh yang dimaksudkan adalah seorang tokoh negara yang mempunyai jasa yang besar terhadap negara dan layak untuk diangkat sebagai negarawan. Menurut Kamus Dewan (2005), tokoh negara adalah merupakan orang kenamaan: orang terkemuka, orang terkenal atau pakar dalam sesuatu bidang. Contohnya, semasa kematian Tuan Guru Nik Aziz Nik Mat, seorang tokoh ulama dan politik Kelantan, walaupun tidak termasuk dalam senarai tokoh yang perlu diberikan penghormatan seperti pembesar-pembesar negara, namun pihak media seperti RTM menyiarkan secara langsung dan membuat liputan yang meluas tentang kematiannya termasuk menyiarkan balasungkawa ketokohan dan sumbangan Allahyarham dalam agama dan politik (Rahmahtunnisah et.al, 2015).

Namun, kematian atau kemangkatan pembesar negara beragama Islam lebih menumpukan kepada Seri Paduka Baginda Yang Dipertuan Agong, sultan-sultan dan kematian pembesar negara dan negeri. Kematian pembesar negara juga dikenali sebagai istilah kemangkatan bagi golongan diraja. Golongan ini merupakan pembesar negara yang merupakan ketua dan golongan atasan bagi unit politik dan pentadbiran dalam peringkat negeri atau negara. Sebagai contoh, berikutan dengan kemangkatan Sultan Perak; Sultan Azlan Muhibbudin Shah Ibni Almarhum Sultan Yussuff Izzuddin Shah Ghafarullahu-Lah pada 28 Mei 2014, laporan media telah dilaksanakan secara langsung istiadat pengkebumian Almarhum. Selain itu sebagai istiadat perkabungan dan kesedihan, seluruh rakyat negeri Perak berkabung selama 100 hari dan bendera negeri dikibarkan separuh tiang sepanjang tempoh tersebut manakala bendera Malaysia pula dikibarkan separuh tiang selama tujuh hari (Jabatan Penerangan Malaysia, 2014).

### **3.0 BENCANA MENURUT PERPEKTIF ISLAM**

Menurut al-Zuhaili (1991) Allah SWT memberi ujian kepada hamba-Nya dalam bentuk bencana adalah untuk memberi ketenangan dalam diri orang yang beriman dan menerima segala bencana itu dengan redha sesuai dengan kehendak-Nya dalam qada' dan qadar-Nya. Menurut Andri Nirwana (2013), terdapat lima kelebihan bagi orang yang ditimpa bencana iaitu Allah SWT mengangkat kedudukannya, menghapus keburukannya, menanam keikhlasan dalam hatinya, mendidik jiwanya dan mendapat anugerah syurga.

Khafidhoh (2013) menyatakan terdapat tiga faktor yang menyebabkan berlakunya bencana iaitu:

- i. Ia merupakan bencana yang datang dari kehendak Allah SWT berdasarkan ilmu-Nya. Ia merangkumi tiga keadaan, iaitu pertama; ia merupakan bentuk hukuman. Al-Quran menggunakan istilah musibah, `azab, `iqab, *tadmir* dan fitnah (Al-A`raf: 137; al-Furqan: 36; al-Syu`ara': 170-173; al-Isra': 15; al-Hijr: 49-50; Ali `Imran: 11). Kedua; Ia merupakan teguran dari Allah SWT dalam bentuk istilah fitnah dan musibah (al-Anfal: 28). Ketiga; Ia merupakan satu bentuk kasih sayang Allah SWT kepada hamba-Nya dengan menggunakan kalimah bala' (al-Baqarah: 124; al-Saffat: 103-106; al-Baqarah: 155).
- ii. Bencana yang terjadi akibat tingkah laku manusia yang menyumbang ke arah kerosakan diri sendiri dan alam sekitar. Fenomena ini ditunjukkan dalam bentuk kalimah *fasad* (al-Baqarah: 11-12; Hud: 116; al-Rum: 41; al-Mu'minun: 71).
- iii. Ia sebahagian daripada bentuk kezaliman yang dilakukan oleh manusia yang ditunjukkan dalam bentuk kalimah *halak* (al-Haqqah: 29; al-Baqarah: 205; al-Nisa': 176; al-A`raf: 4-5).

Menurut Faisal Ahmad Shah (2000), hikmah dan tujuan *al-ibtilla'* yang menimpa seseorang berbeza antara satu sama lain mengikut tahap keimanan mereka, antaranya ialah sebagai tanda rahmat dan kasih sayang Allah SWT kepada hamba-Nya, kifarat kepada dosa yang telah dilakukan, untuk meningkatkan kedudukannya di sisi Allah SWT, mendapat gantian dan pulangan yang lebih baik, membersihkan jiwa daripada sebarang unsur yang boleh mengeruhkan kesucian iman, berupaya menzahirkan hakikat diri seseorang yang sebenar dan berupaya merapatkan hubungan kasih sayang sesama umat Islam.

#### **4.0 ADAB DAN ETIKA KETIKA MENGHADAPI BENCANA DAN KEMATIAN TOKOH ATAU PEMBESAR ISLAM**

Etika ketika menghadapi bencana ini terbahagi kepada apa yang betul dan apa yang salah dan akhirnya menentukan etika moral yang perlu dilakukan ketika berlakunya bencana (Kathleen 2012). Menurut Khafidhoh (2013) yang memetik pandangan Quraish Shihab (2007) dalam

*Tafsir al-Mishbah*, terdapat beberapa adab dan etika bagi seseorang yang berhadapan dengan bencana iaitu:

- i. Mengucapkan kalimah *istirja`*, iaitu *إنا لله وإنا إليه راجعون* yang bermaksud: “Sesungguhnya kami adalah milik Allah dan kami akan kembali kepada-Nya”. Walaupun ucapan itu sering diucapkan ketika berhadapan dengan kematian, tetapi al-Quran memberikan panduan bahawa kalimah tersebut boleh diucapkan dalam setiap kali bencana yang melanda seseorang sama ada dalam bentuk kematian, bencana alam dan sebagainya (al-Baqarah: 155-157).
- ii. Bersabar atas bencana yang melanda (al-Baqarah: 155).
- iii. Bertawakkal kepada Allah SWT dengan meyakini bahawa apa yang berlaku mempunyai hikmah tersendiri dan menyerahkannya kepada Allah SWT serta berusaha ke arah pelepasan daripada bencana yang akan berlaku.
- iv. Berdoa kepada Allah SWT dengan kembali kepada-Nya, mengakui kesilapan dan kezaliman diri, memuja dan memuji Allah SWT, melakukan pengabdian yang sebenarnya kepada-Nya dan tidak mensyirikkanNya, memohon keampunan daripada-Nya, dan memohon balasan yang baik daripadaNya.
- v. Belajar dari bencana yang melanda. Antara usaha yang boleh dilakukan oleh manusia untuk mencegah berlakunya kembali bencana yang melanda ialah mendekatkan diri kepada Allah SWT, tidak melakukan sebarang kerosakan di muka bumi yang boleh merosakkan eko-sistem, membuat penyelidikan dan kajian yang berkaitan dengan pemulihan dan pencegahan bencana.

Justeru, dalam penelitian Ahmad Zaki Ali (2004), beliau berpendapat bahawa umat Islam perlu mewujudkan dan memantapkan pengurusan yang berkaitan dengan bencana (*disaster management*) dalam suatu usaha yang berterusan dan bijaksana untuk menangani bencana.

## 5.0 METODOLOGI KAJIAN

Bagi mendapatkan maklumat dan data-data awal kajian yang diperlukan, sesi perbincangan meja bulat dilakukan dengan menjemput pihak pembuat dasar, ilmuan Islam dan juga pengamal media yang terpilih secara bertujuan. Maklumat daripada kaedah ini telah digunakan untuk ditriangulasikan dengan maklumat daripada fasa kedua pengumpulan data.

Pengumpulan data fasa kedua kajian ini menggunakan kaedah kualitatif dengan reka bentuk temu bual secara mendalam. Kaedah kajian temubual secara mendalam secara bertujuan yang dilakukan ke atas informan yang sudah dikenalpasti lebih awal berdasarkan kepakaran informan dalam bidang kajian ini (Mack et.al., 2009).

Pengumpulan data daripada pelbagai sumber merupakan salah satu proses triangulasi untuk mempertingkatkan kebolehpercayaan dan kesahan data kajian kualitatif (Merriam, 1998; Creswell, 2005). Teknik triangulasi digunakan untuk memastikan kredibiliti hasil kajian. Menurut Creswell (2005), triangulasi ialah satu proses pengumpulan data daripada pelbagai kaedah dan individu. Dari segi persampelan, seorang wakil dari pembuat dasar, lima orang ilmuan Islam dan enam orang wakil pengamal media terlibat dalam kajian ini. Ini bermakna data-data kajian yang dikutip dapat dibuktikan melalui pelbagai kaedah kajian dan bilangan informan.

Kajian ini mengkategorikan tiga ciri informan iaitu pembuat dasar, ilmuan Islam dan pengamal media untuk mendapatkan maklumat mengenai objektif kajian. Jadual 1 di bawah adalah kategori informan dan rasional pemilihan informan untuk ditemu bual dan Jadual 2 merujuk kepada senarai informan yang ditemu bual mengikut kategori.

Jadual 1: Kategori Informan dan Rasional Pemilihan Informan

<b>Kategori Informan</b>	<b>Rasional</b>
Pembuat Dasar	Bertujuan mendapatkan maklumat lebih mendalam mengenai adat istiadat Hari Perkabungan Negara dan aliran proses buat keputusan ketika bencana dan musibah berlaku untuk siaran media.
Ilmuan Islam	Bertujuan mendapatkan maklumat dengan lebih mendalam mengenai konsep perkabungan dalam Islam dan mengetahui kaedah Islam menghadapi bencana dan musibah daripada sarjana Islam.
Pengamal Media	Bertujuan mendapatkan maklumat mendalam mengenai siaran media Hari Perkabungan Negara dan pelaporan berita ketika bencana atau musibah yang melanda negara. Rasionalnya, merekalah individu yang pakar dalam amalan media dan bertanggungjawab menerima arahan daripada pembuat dasar dan mengeluarkan keputusan mengenai pelaporan berita berkenaan.

Jadual 2: Senarai Informan

No.	Kategori Informan	Jawatan	Organisasi
1	Pembuat Dasar	Setiausaha Bahagian Istiadat & Urusetia Persidangan Antarabangsa	Jabatan Perdana Menteri
2	Ilmuan Islam	Pensyarah Kanan Jabatan Akidah, Fakulti Kepimpinan & Pengurusan	Universiti Sains Islam Malaysia (USIM)
3	Ilmuan Islam	Pensyarah Kanan, Jabatan Quran & Hadis	Universiti Malaya (UM)
4	Ilmuan Islam	Pensyarah Kanan Jabatan Al-Quran & As-Sunah	Kolej Universiti Islam Antarabangsa Selangor (KUIS)
5	Ilmuan Islam	Mufti Wilayah Persekutuan, KL	Jabatan Kemajuan Islam Malaysia (JAKIM)
6	Ilmuan Islam	Mufti Diraja Kerajaan Negeri Selangor	Jabatan Mufti Selangor, Majlis Agama Islam Selangor
7	Pengamal Media	Pengarah Radio IKIM	Institut Kefahaman Islam Malaysia (IKIM)
8	Pengamal Media	Penerbit Eksekutif Kanan	Media Prima Berhad (TV3)
9	Pengamal Media	Pengarah Bahagian Program TV RTM	Radio Televisyen Malaysia (RTM)
10	Pengamal Media	Timbalan Pengarah Berita Ehwat Semasa	Radio Televisyen Malaysia (RTM)
11	Pengamal Media	Pengurus Besar Kanan, Penerbitan Politik, Ekonomi & Sosial,	TV AlHijrah
12	Pengamal Media	Pengarah	MobTV



## 6.0 HASIL KAJIAN

Berita bencana dan kematian tokoh atau pembesar Islam adalah sebuah nilai berita yang mendapat perhatian besar dan merupakan makluman awal serta peringatan kepada masyarakat mengenai sesebuah tragedi termasuklah jumlah korban ataupun keadaan semasa yang sedang berlaku. Kajian ini telah mengenal pasti tiga fasa utama dalam pelaporan kandungan media penyiaran iaitu fasa pra-kejadian, semasa kejadian dan selepas kejadian. Jadual di bawah menerangkan persediaan kandungan media penyiaran mengikut ketiga-tiga fasa penyiaran.

Jadual 3: Persediaan Kandungan Media Pra Kejadian

<p>1. Bahan siaran media</p>	<ul style="list-style-type: none"> <li>i. Menyediakan <i>template</i> grafik bacaan doa dan Istirja', surah al-Fatihah dan surah Yassin serta ucapan takziah/belasungkawa kepada keluarga mangsa/jenazah. <i>Template</i> grafik ini perlu disediakan lebih awal bagi menghadapi segala kemungkinan yang berlaku.</li> <li>ii. Menyediakan kapsul yang menceritakan tentang bagaimana menghadapi bencana dan kematian serta meningkatkan ketabahan bagi menghadapinya seperti kapsul mendidik masyarakat menggunakan lafaz <i>Istirja'</i> berbanding al-Fatihah.</li> <li>iii. Menayangkan (boleh mengulang siar) program yang berbentuk Islamik.</li> </ul>
<p>2. Persiapan kakitangan media</p>	<ul style="list-style-type: none"> <li>i. Pengamal media harus terdiri daripada mereka yang mempunyai pengetahuan dan kefahaman dalam agama Islam terutama kepada pembaca berita dan pemudahcara program. Ianya perlu bagi menggalakkan penyampaian informasi yang berteraskan keislaman dan perlu sensitif terhadap pemilihan perkataan atau bahasa yang digunakan.</li> <li>ii. Pengamal media tidak boleh mendesak</li> </ul>

	informan bagi mendapatkan video dan maklumat yang diperlukan dalam pelaporan berita selaras dengan etikaewartawanan. Tidak memfokuskan kesedihan, kekecewaan secara berlebihan untuk menarik simpati demi melariskan berita.
3. Program yang tidak dibenarkan untuk siaran semasa bencana dan kematian tokoh atau pembesar negara beragama Islam	<ul style="list-style-type: none"> <li>i. Siaran rancangan yang berbentuk hiburan</li> <li>ii. Siaran drama sedih keterlaluan</li> <li>iii. Siaran iklan yang keterlaluan/tidak sopan/tidak menghormati sensitiviti masyarakat Malaysia</li> </ul>
4. Kredibiliti sumber dan pakar rujuk	<ul style="list-style-type: none"> <li>i. Perlu merujuk pihak Jabatan Kemajuan Islam Malaysia (JAKIM) untuk mendapatkan senarai sumber pakar rujuk yang bertauliah dan berkredibiliti.</li> </ul>

**Jadual 4: Persediaan Kandungan Media Semasa Kejadian**

1. Istilah yang digunakan dalam pelaporan	<ul style="list-style-type: none"> <li>i. <i>Istirja'</i></li> <li>ii. Takziah/Belasungkawa</li> <li>iii. Jenazah</li> </ul>
2. Kandungan maklumat yang disampaikan	<ul style="list-style-type: none"> <li>i. Pelaporan sesuatu bencana dan kematian tokoh atau pembesar negara beragama Islam perlulah berdasarkan kepada konsep tabayyun sebagaimana yang dianjurkan dalam al-Quran (surah al-Hujurat ayat 6).</li> <li>ii. Mengingatkan masyarakat bahawa penguasaan Allah berterusan dan pengamal media perlu menghormati hak masyarakat untuk mendapatkan laporan yang benar.</li> <li>iii. Jika tersalah melaporkan maklumat, pengamal media perlu segera memohon maaf dalam tempoh 24 jam dan membetulkan</li> </ul>

	<p>semula fakta (ralat).</p> <p>iv. Pelaporan yang bersandarkan kepada konsep mengajak kepada yang baik dan mencegah kepada kemungkaran.</p> <p>v. Pelaporan yang menjaga emosi dan sensitiviti keluarga mangsa.</p> <p>vi. Pelapor berita perlu mengetahui etika dan undang-undang semasa dalam pelaporannya.</p>
<p>3. Format dan kandungan program yang disiarkan</p>	<p>i. Rancangan bicarawara tentang isu, fakta kejadian dan pengajaran sesuatu bencana dan kematian.</p> <p>ii. Mendidik masyarakat untuk beriman kepada qada' dan qadar melalui rancangan bicarawara, tazkirah dan forum.</p> <p>iii. Laporan berita kejadian bencana dan kematian tokoh atau pembesar negara secara berterusan untuk masyarakat mengetahui keadaan semasa.</p> <p>iv. Menzahirkan qada' dan qadar melalui filem atau drama yang ditayangkan.</p> <p>v. Menyiarkan grafik bacaan Istirja', surah al-Fatihah dan surah Yassin.</p> <p>vi. Menyiarkan grafik bacaan doa untuk mangsa atau jenazah dan keluarga mangsa atau jenazah beragama Islam.</p> <p>vii. Menyiarkan grafik ucapan takziah atau belasungkawa kepada keluarga mangsa atau jenazah.</p> <p>viii. Menyiarkan kapsul motivasi berhubung kaedah menghadapi dan mengurus bencana dan kematian.</p>

<p>4. Penangguhan program hiburan dan iklan</p>	<p>Menangguhkan atau menjadualkan semula semua program berbentuk hiburan serta iklan yang keterlaluan, tidak sopan dan tidak menghormati sensitiviti masyarakat Malaysia semasa tempoh perkabungan samada secara langsung atau ulang tayang</p>
---	---

Jadual 5: Persediaan Kandungan Media Kandungan Media Selepas Kejadian

<p>1. Belasungkawa atau takziah</p>	<p>i. Penyiaran grafik ucapan takziah kepada pihak yang terkesan dengan bencana dan kematian tersebut. ii. Penghormatan (<i>tribute</i>) melalui laporan khas atau dokumentari kepada jenazah raja-raja, pemimpin utama atau mangsa bencana.</p>
<p>2. Motivasi kepada keluarga mangsa dan pihak yang berkaitan.</p>	<p>Memberi kata-kata semangat dan motivasi untuk pihak yang terkesan dengan bencana dan kematian tersebut</p>
<p>3. Mengaitkan kebaikan jenazah.</p>	<p>Menjadikan kisah Rasulullah SAW dan para sahabat baginda sebagai tauladan yang dikaitkan dengan jenazah.</p>
<p>4. Menayangkan kapsul hadis dan mengintegrasikan elemen sirah dengan bencana dan kematian yang berlaku.</p>	<p>Ini adalah bertujuan untuk menerapkan pemikiran kepada keluarga mangsa dan penonton agar menerima ketentuan qada' dan qadar.</p>
<p>5. Pemilihan panel jemputan yang berwibawa dan mempunyai kepakaran untuk mengulas serta mendidik masyarakat.</p>	<p>Memberikan ulasan dan pandangan agar masyarakat menjadikan semua kejadian sebagai hikmah dalam kehidupan untuk bertakwa kepada Allah.</p>
<p>6. Mendidik keluarga waris mengenai pengurusan harta pusaka dan kehidupan selepas kematian si mati.</p>	<p>Menambahkan kesedaran dan ilmu keluarga mangsa dan masyarakat dalam pengurusan harta, peninggalan dan wasiat jenazah agar diuruskan dengan sempurna menurut landasan Islam.</p>

## **6.0 KESIMPULAN**

Pengamal media disarankan untuk menjadikan garis panduan kandungan media ini ketika bencana dan kematian tokoh atau pembesar negara terjadi. Hal ini kerana, ia dilihat sangat penting bagi memastikan media menjadi medium yang berwibawa. Dalam masa yang saman menjadi sumber penyebaran maklumat agar masyarakat memahami kejadian yang berlaku semasa kejadian tersebut.

Garis panduan yang dibentuk mengikut fasa penyiaran ini juga dapat dijadikan panduan buat pengamal media penyiaran dalam usaha memurnikan kandungan siaran media ketika negara dilanda bencana dan kematian tokoh atau pembesar Islam berdasarkan prinsip dan nilai Islam sejagat. Para penyelidik mengemukakan elemen dan nilai-nilai Islam berdasarkan Al-Quran, Al-Sunnah, pandangan para ulama', pengamal media serta peraturan semasa bagi menempatkan garis panduan kandungan media ini dalam senarai garis panduan yang sedia ada agar menjadi panduan dan rujukan yang berkredibiliti. Ia merupakan asas rujukan yang jelas berkaitan dengan bencana dan kematian tokoh atau pembesar Islam di negara ini bagi pihak media di setiap organisasi untuk membantu pelaksanaan di peringkat pengamal media secara keseluruhannya.

## RUJUKAN

- Alexander, D. (2006). Globalization of Disaster: Trends, Problems and Dilemmas. *Journal of International Affairs-Columbia University*, 59(2): 1.
- Al-Zuhaili. (1991). *Al-Tafsiru Al-Munir Fi Al-Aqidah Wa Al-Syariah Wa Al-Manhaj*. Darul Al-Fikr Damsyrik: Syria.
- Andri Nirwana, A.N. (2013). Musibah dalam Perspektif Al-Quran, 10(2): 142
- Cresswell, J. W. (2005). *Educational Research: Planning, Conducting and Evaluating Quantitative and Qualitative Research*. Upper Saddle River, NJ: Pearson Merrill Prentice Hall.
- Dewan Bahasa dan Pustaka. (2005). *Kamus Dewan* (Edisi keempat). Kuala Lumpur: Dewan Bahasa dan Pustaka.
- Eisensee, T., & Strömberg, D. (2007). News Droughts, News Floods, and US Disaster Relief. *The Quarterly Journal of Economics*, 122(2): 693-728.
- Faisal Ahmad Shah. (2000). Konsep Al-Ibtala' dan Cara Menghadapinya Menurut Al-Quran dan Sunnah. Disertasi Sarjana Fakulti Pengajian Islam, Universiti Kebangsaan Malaysia.
- Frazier, T. W. (1999). Natural and Bioterrorist/Biocriminal Threats to Food and Agriculture. *Annals of the New York Academy of Sciences*, 894(1): 1-8.
- Kathleen Geale, S. (2012). The Ethics of Disaster Management. *Disaster Prevention and Management: An International Journal*, 21(4): 445-462.
- Khafidhoh. (2013). Teologi Bencana dalam Perspektif M. Quraisy Shihab, Alumni Studi Quran dan Hadis UIN Sunan, Kalijaga Yogyakarta, 14(1).
- Mack, et. al. (2009). *Absolute Poverty and Global Justice: Empirical Data, Mora Theories Initiatives*. Farham, England: Ashgate.
- Malaysia 2014: Buku Berkala*. Kuala Lumpur: Jabatan Penerangan Malaysia.
- Merriam, S. B. (1998). *Qualitative Research and Case Study Applications in Education*. San Francisco: Jossey-Bass.
- Quraisy Shihab. (2007). *Tafsir Al-Mishbah*. Jakarta.
- Rahmahtunnisah Hj. Sailin, Mohd Daly Daud, Sulaiman Salleh, Md. Rozalafri Johori, Muhammad Subari Ramli, Maffuza Salleh, Zulkefli Hj. Aini, Khairiamri Ahmad & Wawarah Saidpudin. (2015). War 51 Editorial Chain Hari Perkabungan Negara: Pengalaman Radio Televisyen Malaysia (RTM). *World Academic And Research Congress*.
- Rautela, P. (2006). Redefining Disaster: Need for Managing Accidents as Disasters. *Disaster Prevention and Management: An International Journal*, 15(5): 799-809.
- Riley, J., & Meadows, J. (1997). The Role of Information in Disaster Planning: A Case Study Approach. *Disaster Prevention and Management: An International Journal*, 6(5): 349-355.
- Vitaliano, D. B. (1973). *Legends of the Earth: Their Geologic Origins*. Indiana University Press: Bloomington.